

竹書紀年義證卷之二十一

通州 雷學淇 述

穆王

名滿

國語曰昔昭王娶于房曰房后生穆王焉史記周本紀曰昭王南巡狩不返卒于江上其卒不赴告諱之也立昭王子滿是爲穆王

元年己未春正月王即位作昭宮命辛伯餘靡

昭宮者昭王廟也命辛伯餘靡者因其振王之功由陝之辛原徙封長子晉爲侯爵且命爲太宰王宅憂梁闇使攝行政事也辛原在盧氏縣陝石鎮西十五里即有神降于莘者長子即今潞安府屬縣其地與潞子黎戎等國錯處故呂氏春秋謂之西翟

冬十月築祗宮于西鄭

自武王至穆王享國百年穆王以下都于西鄭

春秋昭公十二年左傳曰王是以獲沒于祗宮馬融注云祗宮圻內游觀之宮也穆王游行記曰天子入于南鄭郭璞注云今京兆鄭縣也王在喪而作游觀之宮故紀年譏之西鄭即今渭南縣在鎬東百



四十里荀勗等誤以古文西字寫作南故引此紀者皆誤作南鄭○傳云自武王至穆王享國百年謂武王在位十七年成王三十七年康王二十六年昭王十九年至穆王元年共享國百年也此魏史計周有天下至穆王之數與呂刑王享國百年之義不同晉書束皙傳謂此條與經傳大異是皙傳自誤解紀年紀年未嘗與經傳異也穆王以下都于西鄭者此魏史誤以王之沒于祗宮謂王即居西鄭也按下十三年紀云王入于宗周十七年紀云西王母來朝賓于昭宮時並未居西鄭至十八年紀云王居祗宮此猶堯之游居成陽紂之游居朝歌非遷于此也懿王紀始云自宗周遷于槐里則前此皆居宗周可知傳攢漢書注引此傳以駁應劭桓公封鄭之說顏師古注又駁傳氏愚謂桓公固未嘗封鄭穆王以下亦未嘗居鄭也

六年春徐子誕來朝錫命爲伯

徐子即徐戎之後蠻夷之君雖大曰子誕其君之名也嘉其來朝受命故書爵十三年侵洛則仍曰徐戎矣史記漢書淮南子博物志竝謂穆王時徐偃王作亂即下侵洛事也韓昌黎徐偃王廟碑及路史少昊紀皆謂偃王名誕即本於此蓋誕僞行仁義號召諸侯邀王寵命及穆王西征乃僭王作亂也君子不逆詐故此書爵以嘉之韓碑謂誕文德爲治一出于仁義未免過予漢書東夷列傳曰穆王分東方諸侯命徐偃王主之即此錫命爲伯事矣

八年春北唐來賓獻一驪馬是生騾耳

北唐者戎國名獻一驪馬二句傳文也逸書王會曰北唐以閭孔注云北唐戎之在西北者史記秦本紀趙世家竝謂中衍爲太戊御其裔孫孟增幸于周成王是爲宅臯狼生衡父衡父生造父造父幸于周穆王取驥之乘匹與桃林盜驪驊騮耳獻之繆王繆王使造父御徐廣注云臯狼地名在西河漢書地理志亦載其事中山經謂夸父之山北有桃林其中多馬水經河水注桃林塞之夸父山造父于此得華驪綠耳盜驪之乘他書言者尤衆皆謂是造父獻馬此云北唐者北唐即造父之國也自孟增幸于成王封之臯狼國曰北唐即漢西河郡之臯狼縣也今山西永寧州西北有臯狼故址西濱大河在九州之西北與逸書孔注合蓋自成王時來獻閭傳衡父造父造父之先數爲天子御造父能世其業知桃林夸父等處多良馬故求得盜驪騾耳之屬獻之王王遂留造父而使之御後更徙之近封使國于趙也桃林夸父在今陝州靈寶閭鄉二縣界上驪馬即盜驪秦本紀作溫驪騾耳即綠耳此穆王八駿之二也列子周穆王篇載八駿之乘右服藹驪而左綠耳右驂赤驥而左白灋次車之乘右服渠黃而左踰輪右驂盜驪而左山子張湛注盜驪即荀子之纖離穆天子傳灋作義藹作華郭璞注云驪黑馬也爲馬細頸八駿皆因其毛色以爲名號耳四卷華又作藹驪作藹義作藹

九年築春宮

事未詳拾遺記謂穆王有春霄宮在大騎之谷

十一年王命卿士祭公謀父

祭公謀父者周公之孫其父武公與昭王同沒于漢謀父其名也命之者命爲大司馬兼三公也春秋昭公十二年左傳曰祭公謀父作祈招之詩以止王心杜注云謀父周卿士祈父周司馬也掌甲兵之職逸書序曰穆王因祭祖不豫詢謀守位作祭公其篇即禮記所稱葉公顧命也祭或作蔡故誤作葉耳孔晁注云祭公周公之後昭穆于穆王爲祖列謀父祭公名韋昭國語注謂謀父字也左傳注謂祭公名招

十二年毛公班共公利逢公固帥師從王伐犬戎取其五王以東秋八月遷戎于太原毛共逢皆國名公爵班利固皆名也毛即毛懿公之國班去懿公之卒四十餘年未詳是子是孫共有偃姓姬姓二國詩云侵阮徂共箋以爲國潛夫論志氏姓謂共爲偃姓國地在今涇州北五里共池漢書地理志曰河內郡共故國孟康注云共伯入爲三公者此即共伯和之國地今衛輝府輝縣此共公未詳姬耶偃耶穆天子傳作井公利據廣韻則井爲姜姓後地今井陘矣逢國姜姓夏有逢門子商有逢伯陵即王季母太姜之國路史謂在開封逢池所謂逢忌之藪也今青州府志謂廣固有逢城據左傳云有逢伯陵因之是商末遷于青旋爲蒲姑氏所據周之逢國由于太姜當在逢澤也三國本皆伯

爵今爲天子公孤故曰公古禮孤亦稱公故鄉飲酒禮曰公三重謂孤也利班固並見穆天子傳郭璞注云井利天子之嬖臣逢固周大夫毛班毛伯衛之先也帥師從王伐犬戎者犬戎即昆夷詳見殷紀國語云穆王將征犬戎祭公謀父諫王不聽遂征之得四白狼白鹿以歸自是荒服者不至韋注云犬戎西戎之別名在荒服取其五王以東者此魏史附記之傳文也王乃戎之僭稱取謂覆其國而俘其君以告于廟也鎬在西戎之東故云取以東秋八月遷戎于太原者所遷即此五國之君使屬于晉猶成王遷奄君于亳姑使屬齊矣左傳曰晉居深山戎狄之與鄰即謂此五昭十太原即大夏春秋時晉之西南戎寔居之蓋穆王遷之于此日以寢大故夷王宣王皆嘗伐焉漢書西羌傳曰穆王西征犬戎獲其五王又得四白鹿四白狼王遂遷戎于太原

冬十月王北巡狩遂征犬戎

穆天子傳曰戊寅天子北征乃絕漳水庚辰至于口觴天子于盤石之上天子乃奏廣樂載立不舍至于鉞山之下癸未雨雪天子獵于鉞山之西阿于是得絕鉞山之隊北循虓沱之陽乙酉天子北升于口天子北征于犬戎犬戎口胡觴天子于當水之陽天子乃樂口賜七萃之士戰庚寅北風雨雪天子以寒之故命王屬休郭璞注謂鉞山即井鉞山也虓沱河在鴈門鹵城縣據傳及注是王自洛邑北征也是歲出巡至明年冬十月始入宗周

十三年春祭公帥師從王西征次于陽紆至于青鳥之所憩

祭公帥師從王西征者此祭公因王北征未歸知王自北而西恐有不虞故帥師以從王也穆天子傳

謂乙酉天子北征于犬戎至甲午天子西征乃絕險之關隘辛丑天子西征至于蒯人癸酉天子舍于

漆澤

當即滲澤之訛

甲辰天子獵于滲澤丙午天子飲于河水之阿天子屬六師之人于蒯邦之南滲澤之上

戊寅天子西征驚行至于陽紆之山河伯無夷之所都居是惟河宗氏按甲午至癸酉四十日癸酉至

甲辰三十二日至丙午三十四日王自十二年十月下旬北征歷七十餘日是滲澤之獵即十三年正

月矣北征時止云賜七萃之士則此時未嘗帥師可知此祭公之所以帥師從王也後云丙午天子屬

六師之人于蒯邦之南滲澤之上此六師即祭公于是年正月帥以從王者郭注訓屬爲會非是屬者

著也系屬之也蓋已將驚行以極西土六師之人從行不便故留屬于蒯南滲澤也後天子既行祭公

復帥以從之至于陽紆其至當在戊寅後丙午至戊寅已三十三日祭公更當後至十餘日故傳謂癸

丑天子大朝于燕然之山使祭公受幣命井利梁固聿將六師戊寅至癸丑又三十六日也更十二日

乙丑天子始西濟于河自此以後祭公及六師不復從王故紀曰次于陽紆也陽紆之說不一周官作

楊紆謂是冀之澤藪逸周書作揚紆爾雅謂秦有楊陟郭注云今在扶風汧縣西呂氏春秋作秦之陽

華高誘注云陽華在鳳翔或曰在華陰西淮南子墜形訓云秦之陽紆字與竹書同高誘注云在馮翊

池陽一名具圉海內北經及穆天子傳又謂陽紆之山河伯馮夷之所都爾雅邢疏則謂楊陟即弦蒲
今紀云西征次于陽紆此非冀州之藪甚明蜀志郤正傳曰陽肝請而洪災息裴松之注引淮南子曰
禹爲水以身請于陽肝之阿今淮南子脩務訓作以身解于陽肝之河山海經作陽汙高誘云陽肝蓋
秦地穆天子傳曰自宗周瀍水以西至于河宗之邦陽紆之山三千有四百里以諸說推之則謂在汧
隴者少近不然祭公以六師從王豈亦遠涉異域哉○傳曰至于青鳥之所憩此魏史記王是年西征
至三危山聞徐人作亂始東歸也西山經曰三危之山三青鳥居之大荒西經曰三青鳥之所居一名
少鷖一名青鳥水經曰三危山在燉煌縣南今甘肅廢沙州衛城東南二十里有三危山即古燉煌郡
地

秋七月西戎來賓

此即大朝于燕然事穆天子傳曰戊寅天子西征鷖行至于陽紆之山河伯無夷之所都居是惟河宗
氏河宗柏夭逆天子于燕然之山勞用束帛加璧先白□天子使祭父受之癸丑天子大朝于燕然之
山河水之阿乃命井利梁固聿將六師己未天子大朝于黃之山詳按傳義冰夷都陽紆河淤諸侯也
柏夭居溫谷樂都河淤諸侯之長也故謂之河宗溫谷尙在燕然山之西故東行以逆天子朝于燕然
即受冰夷柏夭及凡河淤諸侯之在西戎而來朝者也郭注謂朝是會郡官誤

徐戎侵洛

徐戎即徐子誕史記秦本紀曰繆王西巡狩樂而忘歸徐偃王作亂博物志引徐偃王志曰偃王仁義著聞欲舟行上國通溝陳蔡之間得朱弓矢以已得天瑞遂因名爲弓自稱徐偃王江淮諸侯伏從者三十六國蓋誕旣爲淮夷之長假行仁義收拾人心因繆王西征辭祭公之師獨與柏夭造父等馳八駿以行西極是以僭王作亂西侵河洛也禮檀弓徐容曰昔我先君駒王西討濟于河漢書東夷列傳曰徐戎僭號乃率九夷以伐宗周西至河上即此事洛謂洛汭洛水入河處也故禮記漢書皆言河

冬十月造父御王入于宗周

宗周謂洛邑即周書明堂所謂會方國諸侯于宗周者書正義曰周爲天下所宗王都所在皆得稱之造父御王入于宗周者王聞徐戎作亂歸謀伐徐也秦本紀曰徐偃王作亂造父爲繆王御長驅歸周以救亂穆天子傳曰天子命駕八駿之乘赤驥之駟造父爲御南征翔行逕絕翟道升于太行南濟于河馳驅千里遂入于宗周郭注云翟道在隴西謂截隴阪過蓋王旣聞變專駕赤驥之駟東南翔行歸周救亂也三危在西北洛邑即王城故傳曰南行南濟按竹書王之西征者再次至三危山即歸十七年始至西王母之邦趙世家謂徐戎之叛即在見西王母之年誤

十四年王師楚子伐徐戎克之

趙世家曰徐偃王反繆王日馳千里馬攻徐偃王大破之博物志載偃王志曰江淮諸侯服從者三十六國周王聞之遣使乘駟一日至楚使伐之偃王仁不忍鬪害其民爲楚所敗漢書東夷傳與此畧同謂是時楚爲文王淮南子人間訓以爲莊王皆非是案楚世家熊繹生熊艾熊艾生熊麇熊麇生熊勝熊勝以其弟熊楊爲後熊楊生熊渠熊渠當周夷王及周厲王漢書人表麇作亶當昭王時勝作盤當穆王時楊作錫當共王時然則此時楚君乃熊勝矣此時下距厲王幾百年史謂渠當厲王與勝當穆王亦合人表又謂盤爲艾子錫爲盤子此所聞異詞也謂錫當共王渠當懿王摯與紅當孝王此不如史記世家之言確矣

夏四月王畋于軍邱

穆天子傳曰夏庚午天子飲于滄上乃遣祭父如圃鄭用口諸侯辛未天子北還釣于漸澤食魚于桑野丁丑天子里圃田之路東至于房西至于口邱南至于桑野北盡經林賁口之藪南北五十口十虞東虞曰兔臺西虞曰櫟邱南虞曰口富邱北虞曰相其御口辰天子次于軍邱以畋于藪口郭注云鄭有圃田因云圃鄭房房子屬趙國地有瓚山櫟今河南陽翟縣愚按此下至作重璧臺皆記王東征事也圃田即詩之甫草爾雅之甫田左傳之原圃也水經渠水注云圃田在中牟縣西西限長城東極官渡北佩渠水東西四十許里南北二百許里有沙岡二十四浦津流逕通淵潭相接各有名焉地在

今河南開封府屬穆傳西至下缺文疑即軍字蓋畋于軍邱即畋于圃田藪也故傳曰次于軍邱以畋于藪是年季秋傳亦云天子臨于軍邱狩于藪則軍邱即圃中之地名可知酈注謂房在泚水白馬淵之東今封邱縣蓋疑郭注房子太遠房子今贊皇縣然穆傳一書近尤殘缺集古錄實字記及通鑑地理通釋引穆傳皆有至房子登贊皇山之文今本無此語則郭注房子之說未必果謂圃田矣

五月作范宮

穆天子傳曰口辰天子次于軍邱以畋于藪口甲寅天子作居范宮以觀桑者乃飲于桑中天子命桑虞出口桑者用禁暴人仲夏甲申天子口所庚寅天子西游乃宿于祭郭注云范離宮之名也愚按上文云夏庚午天子飲于滄上此即孟夏之庚午也自庚午至甲寅已四十五日則范宮之作在五月無疑傳文仲夏甲申以下至甲辰浮于滄水乃奏廣樂一段皆當在甲寅作范宮前禁暴人後再接季秋庚口休于范宮此竹書出冢簡冊乖次較輯者誤爲釐敘也據傳文則范宮去滄水不遠殆即於春秋時鄭之汜地作爲游宮矣後襄王居汜因謂其地爲襄城

秋九月翟人侵畢

穆天子傳曰季秋口乃宿于房畢人告戎曰陵翟來侵天子使孟僖如畢討戎又曰祭父自圃鄭來謁留昆歸玉百枝陵翟致賂良馬百駟歸畢之珣以詰其成陵子鬲胡口東牡郭注云陵翟隗姓國也畢

國名言翟前取此珤成猶平也詰猶責也疇胡名按傳文翟于是年侵畢而取其寶王使孟僖討之至明年之春陵子使來致賂並歸畢珤時天子皆東巡未歸故畢人與祭公兩次謁告之也觀紀于明年正月記留昆來賓祭公謁王謂陵翟致賂在留昆歸玉後可知穆傳敘歸珤于前敘告戎于後乃荀勗傳攢等較訂之誤也畢詳殷紀陵翟隗姓乃赤帝帝隗之裔春秋時赤狄潞氏之族也潛夫論志氏姓曰隗姓赤狄廣韻曰陵地名馮翊有陵亭然則疇胡之國與畢近矣

冬蒐于萃澤

穆天子傳曰天子筮獵萃澤其卦遇訟逢公占之曰訟之繇藪澤蒼蒼其中口宜其正公戎事則從祭祀則意畋獵則獲口飲逢公酒賜之駿馬十六締紵三十篋逢公再拜稽首賜篋史狐口有陰雨夢神有事是謂重陰天子乃休日中大寒北風雨雪有凍人天子作詩三章以哀民萃澤即萍澤所在未詳尋考穆傳去黃澤當不遠

作虎牢

穆天子傳曰天子獵于鄭圃有虎在葭中

天子句據太平寰宇記五十二卷引補今本缺

天子將至七萃之士曰高奔戎請生捕虎

必全之乃生捕虎而獻之天子天子命爲柙而畜之東虢是曰虎牢天子賜奔戎畋馬十駟歸之大牢奔戎再拜稽首按紀所謂虎牢即虎柙也因王以柙畜虎于東虢故春秋時稱其地曰虎牢高奔戎本

七萃之士自此乃晉爲大夫故十七年西征爲八駿次車之右

十五年春正月留昆氏來賓

穆天子傳曰天子四日休于濩澤于是射鳥獵丁丑天子口雨乃至祭父自圃鄭來謁留昆歸玉百枚郭注云濩澤今平陽濩澤縣謁告也留昆國見紀年愚案紀年及穆傳此時王東巡未歸所謂濩澤乃雷夏澤也地在今曹州府北六十里蓋王自十四年冬蒐于萃澤作虎牢于成臯今又東巡至雷夏祭公以留昆來賓陟翟致賂之事告于王也觀此後獵于五鹿飲于潒水納盛姬作璧臺田于寒氏之澤尤可徵驗魏紀附注亦云濩澤即雷澤舜漁處郭注以爲晉之濩澤誤已

作重璧臺

此王納盛伯之女立爲長姬築爲臺以居之也穆天子傳于王獵五鹿之後記云癸酉天子南祭白鹿于潒口乃西飲于草中大奏廣樂是曰樂人甲戌天子西北口姬姓也盛伯之子也天子賜之上姬之長是曰盛門天子乃爲之臺是曰重璧之臺戊寅天子東田于澤中逢寒疾天子舍于澤中盛姬告病天子憐之命澤曰寒氏郭注疑姬姓上缺文是說盛姬事又曰爲盛姬築臺言臺狀如壘璧愚案虎牢五鹿樂人寒氏哀次園車皆穆王命地之名五鹿在晉衛界上即晉文公乞食處今大名府東四十五里有五鹿城南臨潒水故傳曰南祭于潒寒氏一名五氏即邯鄲午之私邑左傳謂衛侯將如五氏過

中牟定公傳瓚謂此中牟在漯水之北然則寒氏在大名之東在內黃縣北矣穆傳謂重璧臺在寒氏西是臺之作當在春秋晉地東界上與穆傳西北之說亦合

冬王觀于鹽澤

鹽澤即今解州鹽池左傳所謂鹽也北山經曰景山南望鹽販之澤即此沈氏附注疑此澤非安邑者蓋蒲昌海一名鹽澤去漢時玉門陽關三百餘里即史記大宛傳所謂鹽澤去長安五千里者也沈疑王西巡底流沙必嘗至此故謂安邑者非是實誤穆天子傳謂王既葬盛姬于樂池之南又東征舍于五鹿釣于漯水南征至于蒞臺仲冬甲戌天子乃西征己卯濟河于囂氏之遂癸未至于野王甲申天子北升于大北之陞乙酉西絕鉅陞乃遂西南戊子至于鹽己丑南登于薄山賓輪之陞乃宿于虞庚寅南征吉日辛卯天子入于南鄭郭注云鹽池今在河東解縣水經涑水注曰鹽水出薄山西北流逕巫咸山又逕安邑故城南又西流注于鹽池地理志鹽池在安邑西南許慎謂之鹽鹽長五十一里廣六里周一百一十四里從鹽省古聲今池水東西七十里南北十七里劉逵魏都賦注云東西六十四里南北七十里楊佺期洛陽記曰長七十里廣七里紫色澄渟渾而不流水出石鹽自然凝成朝取夕復終無減損故山海經謂之鹽販之澤也澤南面層山天巖雲秀地谷泉深左右壁立間不容軌謂之石門南通上陽北暨鹽澤澤西又一池謂之女鹽澤東西二十五里南北二十里在猗氏故城南周穆王漢章帝並幸安邑而觀鹽池故杜預曰猗氏有

鹽池據穆傳酈注王之觀鹽澤在今解州甚明涑水注所謂女鹽澤即山海經之子澤也唐宋時尙兩池大歷中因生郭鹽賜號靈慶寶應明成化十一年池分爲三近安邑者爲東池安邑西二十里路村者爲中池近解州者爲西池

十六年霍侯舊薨

霍國侯爵舊名也霍本殷時侯國黃帝後箴姓之封武王滅之以封叔處逸書世俘曰乙巳告禽霍侯世本曰霍國眞姓此即殷侯也逸書作洛曰建管叔于東建蔡叔霍叔于殷管蔡世家曰武王已克殷紂平天下封叔處于霍此則周之霍也周公東征降辟三叔見于周書左傳者甚詳而獨不及霍叔蓋罪輕未滅春秋僖公二十四年左傳曰霍文之昭也杜注云永安縣東北有霍太山見閔公元年今山西霍州西十六里有故霍城在古永安縣西南即霍叔故國舊者叔之裔孫未詳去叔幾世穆天子傳云霍侯舊告薨即此事傳系于陵翟侵畢之後蒐于萍澤之前此因簡錯苟勛等未能詮次耳

王命造父封于趙

史記秦本紀曰徐偃王作亂造父爲繆王御長驅歸周救亂繆王以趙城封造父造父由此爲趙氏徐廣注云趙城在河東永安縣正義曰晉州趙城縣即造父邑二說不同愚案永安之趙乃叔帶奔晉後之食邑邯鄲之趙乃趙敬侯之遷都造父之封國初未詳果何在也水經汾水注從徐說謂趙氏自此

始以紀文考之此時穆王正在晉地則徐說近是造父之先皆以執御幸于天子費昌爲成湯御中衍爲太戊御造父爲穆王御造父六世孫奄父亦爲宣王御以脫千畝之難一藝之精古人亦世其傳如此蓋自孟增幸于成王封之臯狼猶然戎族自造父封趙列于諸侯七世孫叔帶始失國

